



ALTERNATIV DEMOKRATESCH
REFORMPARTEI

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 29. Mee 2020

Här President,

esou wéi d'Chamberreglement et virgesäit, bieden ech lech, dës parlamentaresch Fro un d'Madamme Gesondheitsminister a Justizminister weiderzeleeden.

Mat enger Tracing-App sollen d'Kontakter vun engem groussen Deel vun der Bevëlkerung kënne retracéiert ginn. Esou soll méiglechst séier erausfonnt ginn, wou eng Persoun sech eventuell mam Corona-Virus ugestach huet a mat wíem déi Persoun duerno Kontakt hat, déi si da méiglecherweis och kéint infizéiert hunn. De Konzept vun enger Tracing-App ass ëmstridden. Vill Fuerscher hu schonn hir Bedenke mat Nodrock ëffentlech gemaach a virun esou Applikatiounen, besonnesch wat d'perséinlech Fräiheeten an d'Datesécherheet ugeet, gewarnt. Haaptkritikpunkten, wéi si och bei den Online-Déngschter vu Focus a Spektrum der Wissenschaft ze liese waren, sinn d'Konsequenzen op d'perséinlech Fräiheeten a Rechter an d'wëssenschaftlech Notzbarkeet vun esou enger App.

An deem Zesammenhang wéilt ech de Madamme Gesondheitsminister a Justizminister gär déi folgend Froe stellen:

1. Wat d'Fräiwëllegkeet ugeet, fir dës App ze notzen, déi d'Regierung jo ënnersträicht:
 - a. Gesinn d'Ministere Restriktiounen op Lëtzebuerger oder europäeschem Niveau, déi e Bierger, deem d'App net installéiere wëll, vu gewëssenen Aktivitéite kéint ausschléissen? Wéi eng Restriktiounen wieren an den Ae vun der Lëtzebuerger Regierung akzeptabel?
 - b. Ass d'Regierung der Meenung, datt een nach vu „fräiwëlleg“ schwätze kann, wann d'Notze vun esou enger Applikatioun d'Konditioun ass, fir u verschiddenen Evenementer deelzehuelen oder fir Aktivitéiten dierfen ze maachen?
 - c. Wéi steet d'Regierung zum Beispill zu Iwwerleeungen op europäeschem Niveau, fir d'Reesfräiheet oder Deplacementer un d'Installéiere vun enger Tracing-App ze bannen? Wat géing d'Lëtzebuerger Regierung op europäeschem Niveau maachen, wann d'Regierung vun den aneren EU-Länner esou Restriktiounen an d'Gespréich bréngen? Wéi wëll d'Regierung d'Fräiheet a besonnesch d'Reesfräiheet an Europa schützen an duerchsetzen, wann aner Länner op nationalem Niveau d'Notze vun enger App wëlle virschreiwelen?

2. Och d'Genauegkeet vun der App a praktesch Ufuerderunge si problematesch.
 - a. Ass et richteg, wéi PEPP-PT ermëttelt huet, datt 10-30 Prozent vun de Kontakter net erkannt ginn oder e Feelalarm sinn, well z.B. d'Distanz vun der GPS-Funktioun falsch ageschat gouf?
 - b. Wéi vill Lëtzebuerger hunn e Mobiltelefon, op deem esou eng App kann installéiert ginn (an Däitschland schwätzt d'Press vun 30 Prozent vun de Leit, déi net an deem Fall sinn)?
 - c. Sinn dës technesch Problemer e Grond fir de Choix vun eiser Regierung, keng App ze recommandéieren? Wéi géing eng eventuell europäesch Decisioun fir esou eng App, dës technologesch Problemer aus der Welt schafen?
3. D'Date vun enger Tracing-App mussen entweder zentral oder dezentral gespäichert ginn. Béid Späicherméiglechkeeten droen de Risiko vun engem Leak oder vu Mëssbrauch: Wéi géing d'Regierung, am Fall vun enger europäescher App, de Schutz vun den Daten an der Privatsphär als Grondvoraussetzung vum Dateschutz garantéieren?
 - a. Ass d'Regierung der Meenung, datt den Dateschutz an d'Privatsphär elementar Grondrechter sinn an och an enger Krisenzäit net duerfe vergiess an/oder geaffert ginn? Ass d'Regierung der Meenung, datt och an enger Krisenzäit de Staat kee Recht op eng total Iwwerwaachung a Kontroll vun der Gesellschaft als Ganzt duerf hunn?
 - b. Et ass publik, datt *Google* an *Apple* dat dezentraalt Konzept ënnerstëtzen an déi entsprechend Infrastruktur an hir Betriebssystemer abauen. Dat bréngt eng grouss Ofhängegkeet vun zwee Konzernrise mat sech, wat zu weidere Problemer a Risike féiere kann. Wéi steet d'Regierung dozou, a wat fir méiglech Problemer gesäit si domat verbonnen?
 - c. Am Fall vun dezentraliséierter Späicherung wéi bei *Google* an *Apple* wieren enger Kommerzialiséierung vun de gesammelten Donnéeë jo kaum Grenze gesat. Wéi wëllt d'Regierung esou e Mëssbrauch verhënneren?
4. Ass bei all deene Bedenken eng eventuell europäesch Decisioun fir eng App ze akzeptéieren oder géing d'Regierung fir esou eng europäesch Decisioun Eestëmmegkeet verlaangen an dës mat engem Veto blockéieren?
5. Wéi ginn d'Rechter vun de Bierger protegéiert, wann an deenen enge Länner d'Daten zentral gespäichert géinge ginn an an aneren dezentral? Ass eng Kompatibilitéit vun esou ënnerschiddleche Systemer denkbar a wéi géing déi konkret ausgesinn?

Mat déiwem Respekt,



Fernand Kartheiser
Deputéierten